



RESOLUCIÓN

En data 08/04/2024 presentáronse a esta Tenencia de Alcaldía por parte do Pedagogo Municipal e do Programador cultural as propostas de actividades dos servizo de Educación e de Cultura que integrarán a oferta do programa de verán.

Ambas propostas inclúen, ademáis das actividades, unha proposta de calendario e normativa reguladora da inscrición e adxudicación de prazas no programa de actividades de verán 2024.

Á vista de dita proposta, e en exercicio das facultades que foron delegadas a esta Tenencia de Alcaldía a través do Decreto de Alcaldía número 2023003281, de 21 de xuño de 2023,

RESOLVO:

Primeiro.- Aprobar a inclusión no Programa de verán de 2024 das actividades que se relacionan a continuación por parte do Servizo Municipal de Educación:

PROGRAMA DE VERÁN EDUCACIÓN

1.- MINICAMPAMENTOS

Descrición: Cos Minicampamentos abrimos as portas do tempo libre no medio natural para os máis pequenos, picariños e picariñas de 3 a 6 anos.

Son campamentos en versión “mini”, onde o que de verdade é grande é a diversión, as aventuras e as experiencias que axuden ao seu desenvolvemento san e á súa autonomía.

Este ano as actividades estarán relacionadas con animais que habitan na nosa comarca, e en concreto coas **especies protexidas da Reserva da Biosfera Mariñas Coruñas**.

Tentaremos que os coñezan e que aprendamos do seu hábitat para tratar de favorecer unha actitude positiva cara á súa protección e defensa do medio natural no que desenvolven a súa vida.

Ademais de educar na convivencia e no respecto aos demais, o xogo e o contacto coa natureza serán imprescindibles.

Estas actividades educativas pretenden proporcionarlles aos nenos e ás nenas diversión, aventuras e experiencias que favorezan a súa autonomía e a adquisición de hábitos saudables. Pequenos campamentos que educan na convivencia e na socialización, nos que o xogo e o contacto coa natureza son os protagonistas.

Dous formatos distintos:

Mini 3: Son tres días de actividade sen facer noite con horario de 10:00 h a 17:00 h.



Mini 5: Neste caso o horario da actividade é de 10:00 h a 19:00 h, ata o 4º día no que teñen a posibilidade de quedarse a durmir no campamento. O último día, as familias recollen as crianzas ás 13:00 h.

Destinatarios/as: Nesta experiencia poderán participar os pequenos e pequenas nacidos entre agosto de 2017 e xullo de 2021, aínda que recomendamos os Mini 3 para os nenos e nenas de 3 e 4 anos (nacidos/as entre agosto de 2019 e xullo de 2021), e os Mini 5 para os de 5 e 6 anos (nacidos entre agosto de 2017 e xullo de 2019).

Obxectivos:

- Aprender xogando.
- Fomentar a convivencia e o respecto mutuo, a través de actividades colectivas.
- Achegarse ao coñecemento do seu contorno máis próximo.
- Promover actitudes de conservación e respecto do medio ambiente.
- Educar en hábitos de alimentación saudable.

As actividades terán lugar na Finca Tenreiro, San Pedro de Nós.

Temporalización:

- **Mini3:** Donceliñas das ribeiras do 22 ao 24 de xullo (25 prazas)
- **Mini3:** Escribentes das canaveiras do 12 ao 14 de agosto (25 prazas)
- **Mini5:** Lobiños dos penedos do 1 ao 5 de xullo (25 prazas)
- **Mini5:** Toniñas dos mares do 5 ao 9 de agosto (25 prazas)

2.- CAMPAMENTOS

Descrición: A evolución lóxica dos Minicampamentos que corresponde ao nivel de maduración dos/as cativos/as, son os campamentos e excursións curtas para nenos e nenas que teñan entre 7 e 10 anos. Avanzamos na adquisición de hábitos saudables e na diversión colectiva. Os grandes xogos, a convivencia e as actividades relacionadas coa avifauna e o mar en Galicia, favorecendo o seu coñecemento e conservación en permanente contacto coa natureza, serán o cerne dos “campas”.

Horario:

1º e 2º día: de 10:00 h a 19:00 h

3º e 4º día: completos, facendo noite no campamento

5º día: recollidos polas familias ás 13:00 h

Destinatarios/as: Nesta experiencia poderán participar os nenos e nenas de 7 e 10 anos nacidos/as entre agosto de 2013 e xullo de 2017.

Obxectivos:

- Ofrecer alternativas divertidas e saudables ao tempo libre dos nenos e das nenas.
- Educar para a convivencia, a cooperación e o respecto cos/coas compañeiros/as.
- Investigar sobre os valores naturais e histórico-artísticos do contorno.
- Promover actitudes de conservación e respecto do medio ambiente.
- Educar na consecución de hábitos alimenticios saudables.





Temporalización:

As actividades terán lugar na Finca Tenreiro, San Pedro de Nós.

Campamento “O Zigurat”: do 15 ao 19 de xullo (25 prazas)

Campamento “O Teixo”: do 26 ao 30 de agosto (25 prazas)

3.- EXCURSIÓNS DE VERÁN

Descrición: Despois de que os nenos e as nenas gozasen de actividades preto da súa contorna (Minicampamentos e Campamentos), propoñemos a posibilidade de participar en dúas excursións a fermosos espazos naturais, para que coñezan lugares espectaculares e de grande interese ambiental onde vivir aventuras inesquecibles.

Así pois, aos nenos e ás nenas de 7 a 10 anos, propoñémoslles un destino clásico nas nosas programacións: as **Fragas do Eume**, un dos bosques atlánticos mellor conservados de toda Europa, moi preto da nosa casa e nun dos equipamentos máis interesantes de Galicia, o **albergue Alvarella**.

Para os mozos e mozas de 10 a 14 anos, propoñemos a excursión **Mar de Lira- Carnota**, onde terán a oportunidade de achegarse á costa de Muros, Carnota, Lira...; como lugar máxico e de lendas e vilas mariñeiras onde o contacto coas súas xentes e paisaxes, sempre é lembrado cun sorriso. Unha forma diferente de gozar dun anaco de costa das máis fermosas do mundo.

Destinatarios/as: Para as **Fragas do Eume** unha excursión moi preto de nós, poden inscribirse os rapaces/as de 7 a 10 anos que nacesen entre agosto de 2013 e xullo de 2017. E para **Mar de Lira**, rapaces e rapazas de 10 a 14 anos que nacesen entre agosto de 2009 e xullo de 2013.

Obxectivos:

- Descubrir as características máis definidoras a nivel natural, xeográfico e cultural das comarcas visitadas.
- Promover a convivencia e a socialización do grupo.
- Ofrecer novos xeitos de aprender en contacto directo co medio.
- Promover actitudes de conservación e respecto do medio ambiente.
- Educar na consecución de hábitos alimenticios saudables.

Temporalización:

Excursión Mar de Lira (Carnota-Lira): do 8 ao 12 de xullo (35 prazas)

Excursión Fragas do Eume: do 21 ao 23 de agosto (40 prazas)

4.- HORTAS NO VERÁN

Descrición: Despois de case dúas décadas desenvolvendo o programa de Hortas Escolares, estamos convencidos todos os axentes educadores que participamos nel, que a horta constitúe un gran xacemento de recursos educativos. O seu potencial vén dado pola riqueza de temáticas que se poden tratar na súa realización, con multitude de experiencias e vivencias, contidos pedagóxicos



(conceptos, procedementos, actitudes, valores) e a forza de conexión co medio natural e social do medio máis próximo.

Non se trata dunha parcela na que cultivamos tomates ou leitugas, senón que debemos entendelo como un espazo no que imos tratar unha serie de contidos encamiñados a desenvolver as capacidades dos nenos e das nenas.

Por outra banda, o gran número de recursos didácticos que suxire o traballo ao aire libre, ver como medran as plantas grazas ao noso traballo... son razóns suficientes para realizar esta actividade que constitúe un recurso educativo moi interesante. Ademais este ano faremos unha visita ao mercado de Perillo para aprender algo máis da horta e a alimentación saudable.

Destinatarios/as: Nenos e nenas de 3 a 6 anos, nados entre agosto de 2017 e xullo de 2021.

Obxectivos:

- Desenvolver capacidades de exploración e investigación na horta.
- Familiarizarse co mundo das verduras, hortalizas, legumes..., estimulando un achegamento afectivo e positivo.
- Estimular a iniciativa e a autonomía dos/as picariños/as nas tarefas da hortiña.
- Coñecer o proceso de sementeira, plantación e coidados posteriores, básicos na horta.
- Estimular a afectividade cara a o consumo dos produtos comestibles que nos proporciona a horta.

Temporalización:

- Primeira quenda: do 1 ao 12 de xullo, de luns a venres
- Segunda quenda: do 29 de xullo ao 9 de agosto, de luns a venres

Horario: 2 quendas

- Primeira quenda:
 - CEIP R. M^a del Valle- Inclán: de 11,00 h – 12,00 h (15 prazas), e de 12,05 h – 13,05 h (15 prazas)
- Segunda quenda:
 - CEIP R. M^a del Valle- Inclán: de 11,00 h – 12,00 h (15 prazas), e de 12,05 h – 13,05 h (15 prazas)

Segundo.- Aprobar a inclusión no Programa de verán de 2024 das actividades que se relacionan a continuación por parte do Servizo de Cultura:

PROGRAMA DE VERÁN CULTURA

1.- Obradoiros de Artes Plásticas

Descrición: Un obradoiro de artes plásticas no que o papel, as pinturas e o barro, entre outros materiais, convértense en elementos que axudan a espertar a sensibilidade artística nos máis





pequenos/as ao tempo que pasan un tempo agradable con outros nenos e nenas da súa idade. Unha oportunidade de aproveitamento de forma lúdica e creativa do tempo de lecer.

Destinatarios/as: Rapaces e rapazas nados entre os anos 2012 e 2017. 15 participantes por cada quenda.

Lugar de realización: Escola O Castaño (Perillo)

Temporalización: Meses de xullo e agosto. Son seis quendas de dez sesións cada unha, cunha duración por sesión de 10.00 a 11.45 horas e de 12.15 a 14.00 horas

Mes de xullo:

Do 1 ao 12: quenda I: de 10.00 a 11.45 h	Escola O Castaño (10 sesións)
quenda II: de 12.15 a 14.00 h	Escola O Castaño (10 sesións)
Do 15 ao 29: quenda III: de 10.00 a 11.45 h	Escola O Castaño (10 sesións)
quenda IV: de 12.15 a 14.00 h	Escola O Castaño (10 sesións)

Mes de agosto:

Do 1 ao 14: quenda V de 10.00 a 11.45 h	Escola O Castaño (10 sesións)
quenda VI de 12.15 a 14.00 h	Escola O Castaño (10 sesións)

2.- Obradoiro de Teatro Infantil

Descrición: Obradoiro infantil de iniciación ao xogo teatral no que os nenos e nenas tomarán contacto co xogo físico teatral, cos xogos de relación e a creación de personaxes, o coñecemento do espazo escénico e os diferentes estilos teatrais de actuación.

Destinatarios/as: Rapaces e rapazas nados entre os anos 2012 e 2017. 15 prazas por cada quenda.

Lugar de realización: Teatro As Torres (Santa Cruz)

Temporalización:

1ª quenda: do 1 ao 12 de xullo de 10.30 a 12.00 horas (10 sesións)

2ª quenda: do 1 ao 14 de agosto de 10.30 a 12.00 horas (10 sesións)

3.- Obradoiro de Olería Infantil

Descrición: Obradoiro infantil de iniciación nas técnicas básicas da olería artesanal

Destinatarios/as: Actividade dirixida a rapaces e rapazas nados/as entre 2012 e 2017. 15 prazas en cada quenda.

Lugar de realización: Alfar das Torres (Santa Cruz)

Temporalización:

1ª quenda: Do 1 ao 12 de xullo de 12:00 a 13.30 horas (10 sesións)

2ª quenda: Do 1 ao 14 de agosto de 12:00 a 13.30 horas (10 sesións)



4.- Obradoiro de Ilustración e cómic infantil

Descrición: A ilustración e o cómic constitúen dous elementos fundamentais na formación artística e expresiva dos máis pequenos, aínda máis cando o sistema educativo amosa lagoas importantes neste eido.

Destinatarios/as: Rapaces e rapazas nados entre os anos 2012 e 2017 (15 prazas).

Lugar de realización: Escola O Castaño (Perillo)

Temporalización:

Do 1 ao 12 de xullo (10 sesións) de 10.30 a 12.00 horas

5.- Obradoiro de pintura infantil

Descrición: Obradoiro de iniciación e progresión na pintura, dirixido a que o alumnado infantil adquiera os coñecementos e capacidades básicas para poder realizar unha obra pictórica. Buscarase introducir o contido teórico a medida que se desenvolven as actividades prácticas dun xeito lúdico e estimulante.

Destinatarios/as: Rapaces e rapazas nados entre os anos 2012 e 2017 (15 prazas).

Lugar de realización: Escola O Castaño (Perillo)

Temporalización:

Do 15 ao 29 de xullo (10 sesións) de 10.30 a 12.00 horas

6.- Obradoiro de gravado infantil

Descrición: Obradoiro de iniciación nas técnicas gráficas como produción de imaxes multiplicables por métodos tradicionais, a partir de matrices e da súa estampaxe.

Refírese á elaboración de todo tipo de elementos visuais, desde técnicas de debuxo e gravado ata técnicas relacionadas coa impresión.

Destinatarios/as:

Rapaces e rapazas nados entre os anos 2012 e 2017 (15 prazas).

Lugar de realización: Escola O Castaño (Perillo)

Temporalización: Do 1 ao 14 de agosto (10 sesións) de 10.30 a 12.00 horas

7.- Obradoiro de graffiti e pintura mural infantil

Descrición: O graffiti como método de diversión e expresión.

Destinatarios/as: Rapaces e rapazas nados entre os anos 2012 e 2015 (15 prazas).

Lugar de realización: Escola O Castaño (Perillo)

Temporalización: Do 19 ao 30 de agosto (10 sesións) de 10.30 a 12.00 horas





8.- Obradoiro de Teatro Xuvenil

Descrición: Obradoiro dirixido a rapaces e rapazas que se inician no teatro ou que xa teñen certa experiencia e no que se inclúe xogo físico teatral, xogos de relación e a creación de personaxes, coñecemento do espazo escénico e diferentes estilos teatrais de actuación.

Destinatarios/as: Rapaces e rapazas nados entre os anos 2006 e 2011. 15 prazas por cada quenda.

Lugar de realización: Teatro As Torres (Santa Cruz)

Temporalización:

1ª quenda: Do 1 ao 12 de xullo de 12.00 a 13.30 horas (10 sesións)

2ª quenda: Do 1 ao 14 de agosto de 12.00 a 13.30 horas (10 sesións)

9.- Obradoiro de Olería Xuvenil

Descrición: Obradoiro xuvenil de iniciación nas técnicas básicas da olería artesanal e traballo con torno.

Destinatarios/as: Rapaces e rapazas nados entre os anos 2006 e 2011. 15 prazas por cada quenda.

Lugar de realización: Alfar das Torres (Santa Cruz)

Temporalización:

1ª quenda: Do 1 ao 12 de xullo de 10.30 a 12.00 horas (10 sesións)

2ª quenda: Do 1 ao 14 de agosto de 10.30 a 12.00 horas (10 sesións)

10.- Obradoiro de Ilustración e cómic xuvenil

Descrición: A ilustración e o cómic constitúen dous elementos fundamentais na formación artística e expresiva das persoas.

Destinatarios/as: Rapaces e rapazas nados entre os anos 2006 e 2011. 15 prazas por cada quenda.

Lugar de realización: Escola O Castaño (Perillo)

Temporalización: Do 1 ao 12 de xullo (10 sesións) de 12.00 a 13.30 horas

11.- Obradoiro de pintura xuvenil

Descrición: Obradoiro de iniciación e progresión na pintura, dirixido a que o alumnado adquira os coñecementos e capacidades básicas para poder realizar unha obra pictórica.

Cunha atención personalizada a cada alumna ou alumno, traballaranse as diferentes modalidades do coñecemento pictórico a través dos procesos prácticos, presentando os coñecementos básicos en torno a teorías, métodos, instrumentos e procesos técnicos que interveñen no exercicio da pintura.

Destinatarios/as: Rapaces e rapazas nados entre os anos 2006 e 2011. 15 prazas por cada quenda.

Lugar de realización: Escola O Castaño (Perillo)

Temporalización: Do 15 ao 29 de xullo (10 sesións) de 12.00 a 13.30 horas



12.- Obradoiro de gravado xuvenil

Descrición: Obradoiro de técnicas gráficas como produción de imaxes multiplicables por métodos tradicionais, a partir de matrices e da súa estampaxe.

Refírese á elaboración de todo tipo de elementos visuais, desde técnicas de debuxo e gravado ata técnicas relacionadas coa impresión.

Podemos definir as artes gráficas como un proceso artístico de creación e elaboración dun determinado deseño, utilizando un medio polo cal a imaxe transfírese a un substrato, creando así unha expresión artística.

Destinatarios/as: Rapaces e rapazas nados entre os anos 2006 e 2011 (15 prazas).

Lugar de realización: Escola O Castaño (Perillo)

Temporalización: Do 1 ao 14 de agosto (10 sesións) de 12.00 a 13.30 horas

13.- Obradoiro de graffiti e pintura mural xuvenil

Descrición: O graffiti como método de diversión e expresión.

Destinatarios/as: Rapaces e rapazas nados entre os anos 2006 e 2011 (15 prazas).

Lugar de realización: Escola O Castaño (Perillo)

Temporalización: Do 19 ao 30 de agosto (10 sesións) de 12.00 a 13.30 horas

Terceiro.- Aprobar a seguinte normativa reguladora da inscrición e adxudicación de prazas no programa de actividades de verán 2024

O programa de verán abrangue un conxunto de actividades organizadas polos servizos de Cultura, Deportes, Educación e Xuventude para o tempo de lecer.

O procedemento de preinscrición, adxudicación de prazas, pagamento e inscrición axustarase ás normas que se detallan a continuación.

Toda a información relativa a este proceso publicarase na páxina web municipal (<https://www.oleiros.org/es/>).

I.- Requisitos das persoas participantes

En cada actividade definiranse os rangos de idade que abrangue, e só poderá admitirse quen estea dentro do dito rango.

En certas actividades, polo seu contido, definiranse requisitos especiais que cómpre cumprir inescusablemente (por exemplo, saber nadar etc.).

II.- Preinscrición

O procedemento de solicitude iníciase cunha preinscrición, que deberá realizarse de acordo coas seguintes condicións:

- ✚ A preinscrición telemática debe realizarse obrigatoriamente na web municipal www.oleiros.org, no catálogo de trámites da sede electrónica (non é necesario estar rexistrado/a). Buscar **actividades de verán** no buscador.
- ✚ Admitirase unha única solicitude por participante (**a nome e cos datos do neno ou nena** interesado/a) e nela poderán marcarse ata un máximo de 3 actividades, indicando a orde de





preferencia. Na sede electrónica a orde de preferencia virá determinada pola orde de inscrición. É dicir, a actividade que se seleccione como primeira opción no despregable considerárase a primeira na orde de preferencia.

- ✚ As situacións de acollemento familiar, separación ou divorcio nas que os/as menores non consten como empadroados/as, deben ser comunicadas mediante correo electrónico **durante o período de preinscrición**.
- ✚ Se alguén presenta máis dunha solicitude co mesmo nome a través da sede electrónica darase como válida a última presentada.
- ✚ Quen pretenda acollerse a algunha bonificación (Servizos Sociais, familia numerosa...) deberá acreditar o seu dereito mediante a aportación dos documentos pertinentes no intre do pagamento.
- ✚ As persoas que se preinscriban deberán gardar o xustificante co número de referencia para poder localizar a súa solicitude en calquera momento.
- ✚ As listaxes de todas as persoas preinscricitas publicarase na web municipal. En caso de advertir erros ou omisións, as persoas interesadas poderán comunicalo mediante un correo electrónico enviado a afabrica@oleiros.org, ou ben telefonicamente no número 981 636 598, dentro do prazo que se sinale no anuncio.
- ✚ Nas listaxes publicadas cada solicitude levará asignado un número específico a efectos de sorteo.

III.- Adxudicación de prazas

- ✚ No caso de que o número de solicitantes dunha actividade sexa inferior ao de prazas convocadas, a adxudicación será directa e definitiva.
- ✚ Se houber máis solicitantes que prazas, resolverase mediante un sorteo público que se realizará no auditorio da Fábrica (rúa do Inglés 13, Perillo).
- ✚ Cando unha persoa resulte admitida nunha actividade e teña irmáns ou irmás solicitantes de praza na mesma actividade, e coa mesma orde de prioridade, estes últimos incorporaranse á lista de admitidos/as, sempre que o permitan as características propias de cada actividade.
- ✚ O sorteo efectuarase en función do número asignado a cada solicitude, determinando como admitidas as persoas que teñan o número que saia no sorteo e os sucesivos, ata encher o número de prazas da actividade.
- ✚ As listas de persoas admitidas serán publicadas na páxina web municipal. As solicitudes inicialmente sen praza pasarán a formar parte dunha lista de agarda, para o caso de renuncias ou vacantes posteriores.

IV.- Inscrición e pagamento

- ✚ No caso de estar admitido/a nunha actividade e non ter interese en formalizar a inscrición deberase notificar á maior brevidade posible por correo electrónico enviado a afabrica@oleiros.org.
- ✚ Para adxudicar a praza será necesario realizar o pagamento da actividade, dacordo coas instrucións ou a ligazón que se faciliten ás persoas admitidas mediante correo electrónico.



- ✚ Así mesmo haberá que formalizar a inscrición nos formularios que poña a disposición o Concello no momento da admisión.
- ✚ En caso de non presentar a documentación requerida en prazo, considerarase desistida da súa solicitude .

V.- Prazas vacantes

- ✚ Unha vez rematado o prazo de pagamento e inscrición, no caso de resultar prazas vacantes, farase un único chamamento ás persoas que se atopen en lista de agarda, ata cubrir o número de prazas vacantes, o que lles será comunicado mediante un correo electrónico, ofrecéndolles un novo prazo de pagamento
- ✚ Finalizado o dito proceso, no caso de quedar algunha praza vacante nalgunha das actividades, iniciarase un prazo de inscrición libre para persoas empadroadas e non empadroadas. Estas prazas adxudicaranse por rigorosa orde de entrada da solicitude.

VI.- Calendario de inscrición 2024

- ✚ As datas estimativas para o proceso de inscrición devandito no ano 2024 serán as seguintes:

DATAS	TRÁMITE
Do 23 ao 30 de abril	Preinscrición telemática na sede electrónica, só para persoas empadroadas e un máximo de 3 actividades
Do 6 ao 8 de maio	Publicación de listas de preinscricións e achega de reclamacións a través do enderezo electrónico afabrica@oleiros.org
15 de maio	Sorteo público ás 12:00 horas no CC A Fábrica
20 de maio	Publicación de listas definitivas na web municipal
Do 27 ao 31 de maio	Pagamento e entrega de documentación
Do 5 ao 10 de xuño	Xestión de listas de agarda, pagamento e entrega de documentación
A partir do 13 de xuño	Publicación de vacantes e inscrición libre para persoas empadroadas e non empadroadas

- ✚ O Concello de Oleiros poderá modificar este calendario informando en todo caso destas modificacións a través da páxina web e redes sociais do Concello.
- ✚ O Concello de Oleiros poderá anular actividades nas que non se acadase un número suficiente de persoas participantes, ou en calquera momento en función das circunstancias excepcionais ou recomendacións sanitarias.

En Oleiros, asinado dixitalmente na data que figura na marxe pola Sétima Tenenta de Alcalde, delegada de Cultura e Normalización Lingüística, Ensino e Xuventude, e o/a Secretario/a accidental, que da fe. (Asinado aos efectos exclusivamente do artigo 3.2 do RD 128/2018 de 16 de marzo e o artigo 2.1 do Decreto 24/2018 do 15 de febreiro).

